

開放文學－科幻寓言－蝸觸蠻三國爭地記 第十三回 監留學瀛海起風潮 募工人國民爭抵制

初，蝸牛國派遣留學生於海外，一時卵生、濕生、化生之徒，各率丑類以往，如蚊蚋蟻蟲之聚，蓋不下萬人焉。於是，蝸牛國始派遣金龜子【段公路《北戶錄》：金龜子，甲蟲也。五六月生草上，大如榆莢。金龜子行則成雙，其蟲死，金色隨滅，如螢光也。南人收以養粉】為留學監督。金龜子虛有其表，金玉其外，而胸中實無點墨。與論新學，幾如夏蟲之不可與語冰【《莊子》：夏蟲不可與語冰者，篤於時也】，井蛙之不可與語海也。故一經前往，即遭拒絕，不能終任而去。未幾，觸國有取締留學生之令。其激烈者，甚至為拔刀舉火之暴動。不得已，稍稍限制之，勢稍刹。然斯時之風潮，不特見於學界，漸漸及於國民。

有美人蠃國，去蝸牛國不知幾萬里。自古隔海，永不相通。有航海者，張鸞帆【《番禺雜記》：鸞背有骨如扇，乘風而行，名鸞帆】西窮，得其地，始見通於上國。然美人蠃辟，地曠人稀，利用二人，始招蝸牛國之華蟲，往為開闢地利。及成效既見，美人蠃國本土之工人慕之。其工黨曰射工，為鬼為蜮，尤善含沙射人，設種種苛例以相待。至是，國民乃倡議，抵制美人之貨物，以為報復之計。美人蠃國之商務大壞，始允稍改其苛待之例。其後，觸國以蝦蟆丸【漢古曲《董逃行》：玉兔長跪搗藥蝦蟆丸，奉上陛下下一玉杵。服此藥可得神仙】商艦，暗運軍火入蝸牛國，國民又群起抵制觸國貨物。風起潮落，勢甚洶湧，甚至影響及於政界。其以鯁直自命者，對於外人之審判，亦用強硬手段。

先是，大令江雞【《古今注》：蜻蜓有青赤黃三種。淮南人呼為康伊，鄱陽人呼為江雞】，憤萬人之專橫，遇事執法不撓，致為外國教士所戕。眾不能堪，聚眾擊殺教士。然卒議款撫恤，含糊了案，官場亦積不能平。厥後，因蝦蟆爭官私事【《中州記》：惠帝為太子，在華林園聞蛙聲，聞左右曰：「此鳴，為官乎，為私乎？」】，復有大鬧公堂之舉。然競爭正以促文明之進步，民氣日張，進化日速。

蝸牛王漸知，國事雖孱弱，而民情則強固可恃，乃下詔變法，誓與民更始。國中父老，咸手捋蝦鬚，扶杖觀聽，願少須臾毋死，思見德化之成也。正是：

競爭即是文明母，進步爭如不翼飛。